



Ayo Rey Momo... Carnaval 2013 ta dia 10 di februari



DAKOTA - Rey Momo a despedi den un Aruba Entertainment Center cu hopi ambiente cu TBS Brass Band, show di Aruba su Reina di Carnaval 58, figuranan di Carnaval 58, Rey di Tumba, Rey di Calypso, banda D-Licious, y banda di aña Youth X-Treme y su Roadmarch King bisando asina ayo na nos Carnaval 58.

Testament di Rey Momo 2012

Nos celebracion cultural mas grandi cu ta wordo celebra anualmente esta nos gran Carnaval Arubano. Nos di 58 Carnaval lo keda graba pa semper den historia di Carnaval como un Carnaval luhoso, mahestuoso, precioso, creativo, colorido, mas sensacional cu Aruba a conoce. Un Carnaval 58 cu nos ta kere cu no lo conoce su morochu. E Carnaval aki hopi nos a siña di dje caminda cu riba termino corto lo bay traha pa mehora unda tin cu mehora y tambe yega na palabracionnan adelanta pa asina evita momentonan menos bon durante e celebracion. Cu dialogo por logra hopi pero semper cu e meta principal cu e mester ta na bienestar di Aruba su Carnaval. Prome cu boso kima mi, mi kier a pidi pa haci publico mi siguiente testament:

1. Mi ta laga atras un pabien y un danki masha grandi atras pa tur esnan cu a coopera pa asina Aruba por a celebra su Carnaval na un manera, mahestuoso yen di ambiente y alegria, tanto den e paradanan como na banda.
2. Tambe mi ta laga atras un danki special na e participantenan den e paradanan na San Nicolas y na Oranjestad, ya cu nan ta esnan cu ta haci e show espectacular riba nos camindanan y cu tur hende ta gosa di dje y cu ta haci cu Carnaval di Aruba si ta Carnaval.
3. Pa tur e candidatanan cu a participa na e eleccionnan di Reina, tanto Infantil, Hubenil, Reina

di Carnaval y Señora Carnaval ta keda un palabra di felicitacion pa nan bunita presentacion, mensahe y shownan cu ta mantene e nomber di nos Carnaval di Aruba na halto y tambe tur nos prins y panchonan Infantil, Hubenil y Grandi.

4. Pa tur e diseñadornan di e trahenan, carosanan, body y roadpiecenan, na nos musiconan, compositoran, areglistanan mi ta laga atras un felicitacion y un danki pa nan creatividad cu a luci den e gran paradanan y shownan.

5. Mi ta laga atras un danki special na tur e bandanan cu den e paradanan a toca e composicionnan Arubano, producto di nos compositoran, kendenan sin duda algun a contribui na engrandece nos repertorio musical. Entre man mi cu tin cu menciona nos Roadmarch 2012 "Ban pa mi", e Calypso "Aruba a dicidi" y tumba ganado "historia". Alabes mi no por keda sin menciona e Roadmarch Infantil, Hubenil cu e aña aki a ser acompaña pa e banda "Impak".
6. Mi ta laga atras nos di cuatro Tumba Infantil, Hubenil cu tabata un exito total, acompaña pa un All Star Band.

7. Mi ta laga atras un felicitacion pa henter nos pueblo Arubano, sacando afo esnan cu a comporta nan mes menos bon, pero si pa tur demas cu a demostra nan bon comportacion y civismo.

8. Mi ta laga atras un danki grandi di curason pa tur e miembronan di SAC cu e aña aki atrobe a traha cu cuerpo y alma pa tur e preparacionnan di e diferente eventonan pa asina Aruba por a disfruta.

9. Mi kier a laga atras otro danki grandi pa tur, pero tur e cuerpo di boluntarionan balente di e crew di SAC cu a traha e aña aki, pa por a tene tur cos bao control.

10. Pa nos Cuerpo Policial mi

laga atras un danki grandi pa nan pasenshi, bon cooperacion y comprension. Ta un biaha pa aña nos tur ta hunto den e temporada dushi aki hunto cu henter e comunidad di Aruba, y di un manera of otro ta haci sacrificio na beneficio di nos pais. E respet pa nos cuerpo policial mester keda semper pa asina nan por sigui eherce nan trabou sin problema. Sperando cu nos por yega un dia caminda cu nos por celebra un Carnaval sin ningun incidente negativo.

12. Pa personal di Cruz Cora, Servicio di Ambulans, Imsan, DIP, Brandweer, Serlimar, Eco-Tec, Departamento di Obran Publico, boluntarionan cu a tuma na nan encargo cuida nos medio ambiente mi ta laga un danki grandi pa nan trabao cu ta cuminsa for di den oranan di marduga.

13. Pa prensa skirbi, radio, television di Aruba, kende nan a contribui cu nos gran Carnaval Arubano, mi ta laga un danki grandi pa nan cooperacion. Danki na boso aporte e comunidad Arubano por a keda na altura di tur locual ta sosode durante e temporada di nos celebracion di Carnaval.

14. Mi ta laga atras un danki na gobierno di Aruba y tur e departamentonan gubernamental cu a percura pa e tentnan riba e ruta di Carnaval cual a duna un realce na nos Carnaval. Aruba un biaha mas a score.

15. Danki na comercio, industria y henter comunidad Arubano sin excepcion pa nan cooperacion cu a contribui sigur na e exito di nos gran Carnaval no. 58. sperando cu grupo, banda y SAC por sigui conta cu e aporte y sosten di comercio di Aruba pa Aruba por sigui celebra su Carnaval. Sigur SAC no kier keda sin gradici tur e patrocinadonan cu a sosten SAC durante e Carnaval

aki. Boso aporte tabata tin hopi importancia pa loke ta nos celebracion di Carnaval.

16. Mi ta laga atras e fecha di e Gran Parada di Carnaval na Oranjestad pa aña 2013, cual lo ta e 2 diadomingo di luna di februari, scucha bon, e gran parada di Carnaval lo tuma luga riba diadomingo 10 di februari 2013. Mi ta ripiti: Carnaval di otro aña lo ta dia 10 di februari 2013 pues di awor caba cuminsa prepara pa nos dushi Carnaval 59, cu den 2013 Aruba lo ta un biaha mas na cabes. Aruba por ta orguyoso di su Carnaval 59, un Carnaval yen di pikete, pa asina tambe nos cuminsa habri e caminda pa e celebracion di diamante cual ta Aruba su di 60 Carnaval cual sigur lo priminti di ta un tremendo bacchanal.

17. Berdaderamente Carnaval 58 a resalta den creatividad y luho tur afo yena di fantasia, pesey mes mi ta haci un suplica na tur e comunidad Arubano specialmente e participantenan, cuminsa prepara desde awor pa e gran celebracion di Carnaval 59. Pa finalisa mi kier duna un biaha mas un danki na henter nos comunidad maske den tur e turbulencia ainda den e ultimo parada tog por wak e final uno exitoso. Ban den un gran union pa sigui e ehempel cu nos pueblo a duna e aña aki. Asina nos por mantene e mahestuoso y grandioso Carnaval Arubano como esun di mas sigur, mas safe y unico na mundo y nos lo por keda bisa cu: Carnaval di Aruba si ta Carnaval.

Despues di kima mi bay cas frankilo y laga nos ban dedica nos mes na asuntunan serio na bienestar di nos comunidad. Duna dia 21 di februari, bispo di diaranson di shinishi, bispo di Carnaval 59, den 2013 cu Aruba na cabes. □

firma: Rey Momo. □